

selbs die zungen mit darzu präparirten electuario geriben,
kam die rede wider, also das er ohne alles feelen verstend-
lichen und wie vormals alle wort ufssprechen konte, dess-er
Got dem allmechtigen zuforderst und dann meniglichem,
5 so hiezu rath und thatt gethon, das im also schnell wider
geholfen, hohen dank saget. Wiewol er ain grosen kommer
und schrecken ab solchen zufahl gefast, so wardt im doch
sollichs, sovil möglich, ufsgeredt. Es schickt im doctor Jörg
Han von Überlingen ein gelerten jungen medicum, hiefs
10 doctor Valentin Butzlin, kam von Ingelstatt. Der thette
allen müglichen fleis und observirt alle momenta, damit er
die qualitates, so exorbitirten, wider zu recht brechte. Aber
der cursus naturæ war so weit kommen, das es nit sein
mecht. Als nun derselbig sahe, das er nit vil ufsrichten,
15 nam er ein glimpfigen abschidt und zoge wider darvon. In
wenig tagen darnach, eins morgens, als im seins vetterns
gemahl zu essen bracht, dann er in seiner krankhait sonst
nichts anders, dann was sie selbs kocht, esen welte, kam
im under dem esen abermals ain solcher geher zufahl in
20 magen, das er grosen schmerzen und unlust befandt, der-
gleichen ein enderung im ganzen leib. Derhalben beschickt
er eilendts sein beuchtvatter. Der höret in zu beucht und
las im in der stuben ein mess, nach welcher liefs er sich
ganz christenlich mit dem hochwürdigen sacrament versehen.
25 Das konte so baldt nit beschehen, seine sachen fiengen sich
an umb etwas wider zu bössern, wiewol kain bestandt do
war. Des andern tags darnach, wie er in seinem gemach
zu morgen afs, kam ain gaist (ob es der guet, oder bö
genius sei gewesen, ist zweifelig) und scheuret im das feur
30 im offen und klopft an der thür, wiewol er das nit hörte,
auch war kain feur im offen. Über ein kleine weil klopft
er im drei streich an ain casten in der stuben, dardurch
man in ein briefgewelb hinabgieng; auch war es nit anders,
dann als ob ein mentsch in selbigem casten wer und sich
35 umbkertè. Das beschach so hell und urschaidenlich, das
sein vetter, auch die diener und knaben, so uf in warteten,
einandern ansahen und dessen etwas schrecken empfiengen.
Es war iederman still und het ain ufmerkens, ob der alt
herr das gehört hett. Aber man kunt bei dem wenigsten
40 nit speuren, das er das gemerkt, wie dann oft beschicht,
das der ein etwas hört oder sicht, das der ander nit ver-
nimpt. Diser gaist hat sich vor etlicher zeit im newen haus,